

郭襄靖公遺集

郭襄靖公遺集卷之十五

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

諸議

總督兩廣

叅贊留樞

總督條約

爲督撫地方事照得本院部謬叨

簡命總制兩藩地廣事繁任艱責鉅固不欲多事以
啓紛更亦不敢因循而滋弊蠹切懷千慮特析數
條槩不越于已行惟期臻乎實效除一應循環比
較歲報季報常行諸務悉照前部院已定事規施
行外爲此案仰本司照依案驗內事理即便轉行
督屬大小文武衙門一體遵照將各款事宜着實
舉行誠以地方多故物力且疲欲求以致治安必
須大加申飭若夫姦之所伏法之所遺類而推之
俾弊絕風清民安物阜本院部得藉以寡過則所

望於諸司者不淺渺也該司仍備呈巡按衙門知會及動支官銀刊示明楷徧發張掛印刷書冊分給遵守俱毋違錯抄案具由呈來

一稽覈吏治夫吏治淑慝民生休戚地方安否係之非細故也顧人才難得亦甚難知彼闕茸卑猥者無論已有敏辨而英華外著者有樸茂而條理中存者重在實心任事真意爲民而廉德其本也蓋惟廉則無所偏護而自公無所壅蔽而自明無事慘酷以濟其私而自仁苟操持一

失則政體俱隳此稽覈之所當急也廣地遼濶
官屬衆盛其間恪共職業砥勵清脩者固多而
玩愒怠縱者亦有之若不嚴爲甄別賢否易淆
勸懲無據豈所以飭吏治而安民生哉本院部
忝爲風紀之司屬僚之倡矢崇節約以共成羔
羊素絲之風文到之日布按二司并守巡各道
即便轉行所屬府州縣等官各遵照務期因心
出治約已裕民弭盜綏良懲姦剔蠹寓教化於
刑罰存撫字於催科毋事刻深毋尚侈靡毋容

佐領魚獵毋縱左右恣睢懇懇孳孳無一非真
德實意至誠而不足以治民獲上者未之聞也
果有砥節勵行卓然不爲頽習所移及貪墨顯
著公論共棄者該司道訪撫實跡不時揭報其
餘俱以半年一次填造考語繳查間或初政可
觀晚節頓易或始事未諳久乃更練或因事戒
飭終能悔悟者俱與從實填註不妨先後異同
毋得失真致難綜覈

一申飭將領夫將爲三軍司命秩有崇卑而一方

安危所寄則甚重也廣中山海多故原設將領
多員每員標下雜流及犒賞糜費歲不下千金
次亦可數百金即管堡領哨指揮千百戶等官
其廩糧跟役亦以百十金計所以養之不爲不
厚矣爲各將領者潔已恤兵捐軀奉

國其職分也今諸將領其恪職匪懈馭士有方者固
有之間多不明大義惟便身圖或偷安怠事而
視防禦不經心者或推姦避難而務虛文以塞
責者甚有多方朘削以充私囊而軍兵疾苦置

之不恤以致部曲離心潰叛莫禁者即近事有
可鑒也各將領其襲自先職者獨不念祖宗百
年汗馬之勞以貽今日其起自布衣者獨不念
生平驅馳矢石櫛沐風雨出萬死不顧一生乃
克致此萬一墮廢自罹罪罟則先業前功爲之
盡棄豈所以忠

朝廷慰祖宗保身家之善計哉文到之日各守巡等
道轉行各將領官務要痛自砥勵共濟時艱統
束軍兵振揚威武平時務撫以恩信與士卒同

甘苦遇警即便以身率先奮勇截捕不致滋蔓
難圖敢有剝兵黷貨玩寇殃民及指稱科斂餽
遺等弊該司道時加廉訪摘其尤者不時密切
開報每半年仍備造賢否文冊繳查其各衛所
有養病及爲事革職閑住副總叅遊都司守備
等官例聽軍門委用俱附造冊未備將年力才
畧有無堪用據實填註考語以憑施行

一清理軍伍

國初設各衛所官軍於各府州縣專以守禦城池地

方而在營餘丁亦俱籍名在官以備緩急調遣
此定制也今北邊及四川雲貴等處用以禦虜
防番盡屬軍士卽閩浙亦有軍丁船隻兼同募
兵出海禦倭獨兩廣地方則軍丁殊不足用專
恃募兵至通省水陸募兵共三萬餘名歲費餉
銀三十餘萬兩賦繁斂急民窮盜起未必非此
之由也况募兵旣費而散兵尤難卽有病弱汰
革者往往潛住境內糾結爲非議者謂去兵之
難難於去盜誠然哉爲今之計須將各衛所正

軍餘丁嚴加清覈毋容勢豪隱匿毋容衛所役
占毋容幫戶私替毋容族屬輪當毋容變亂用
籍脫軍爲民選其精壯之尤者照依募兵編立
營伍統於將官與募兵一同操練每軍丁月糧
之外日加銀一分以示優厚訓練旣熟與同募
兵一例征調獲功一體敘賞如此清理如此訓
練而謂軍不可用用有不效萬無是理也誠練
軍丁一營即可省募兵一營省募兵一營即可
養軍丁三營行之旣久行伍日充募兵日少餉

費日省一轉移之間而數利集焉誠今日之急務也布按二司卽行清軍并各守巡道備查所屬衛所原額官軍若干逃亡若干見存若干逃亡者嚴行該府州縣設法勾補并將各衛所官戶下舍餘若干旗軍下餘丁若干有無食糧逐一查出除梧鎮上班撥守城舖及各官員下遵例跟役各若干外其餘盡發編隊入操按月加糧務使軍沾實惠官收實用敢有隱匿役占私替輪當及脫籍等弊卽便從重究治限四箇月

內造冊繳報間有應酌議事宜不妨詳奪

一整飭兵防查得本省副叅遊守六水寨把總及各營哨募兵以數萬計戰艦以數百計其布置防禦之法不爲不周矣使兵皆精強足以摧鋒陷陣船皆堅厚足以破浪衝風則何守不固何戰不克何寇警之足畏哉訪聞各路募兵率皆老弱備數名爲水兵不習風濤之險名爲陸兵不知擊刺之方上下相蒙虛冒居半至於戰船尤多脆薄不堪敝壞不葺雖時請給價修理每

每虛應故事釘稀板薄竟備空名卽有舵師橈
手將安用之今徼天幸海波息警苟且塞目前
萬一鯨鯢未盡侵犯海洋以此兵船其能揚帆
鼓柁與角勝於波濤洶湧間耶其裏海哨船多
屬虛數至有兵徒設而船未置者諸如此類何
所藉以防禦寇盜保衛村民哉各守巡等道會
同副叅遊守等官備查該路原設某營寨兵若
千船隻若干是否處置得宜緩急足賴及壞爛
船器應脩而未脩羸弱兵夫應汰而未汰者作

何清覈作何整頓逐一酌議呈奪各守巡道一方重寄尤須申嚴法令務考成功海防官專司稽董捕盜官專司捕禦俱宜殫心竭力各舉職守共靖地方

一化導頑民兩廣地方向稱多盜固山川爲之限隔亦所以撫綏化導者有未至耳夫人非禽獸至於甘爲盜賊而不耻者豈盡出其本心哉或迫於饑寒或困於征輸或苦於債負或冥頑無覺被人誘惑而不自知亦或本非無良誤被讎

板繫名照捕不敢出訴而遂投合兇徒者似此
之類情尚可原勢難盡殄使各州縣正官真有
視民如子之心曉諭各里排人戶各查其戶下
有此無知之徒痛加勸戒責以改行從善開其
自新之機告之約保人等查果真實結報州縣
州縣官查果真實轉報道府爲之真詳撫按衙
門宥其前罪許爲良民其係照捕有名者文案
悉與銷除其化導不從恣惡如故各里排明白
具首或自綁解或告官擒捕以正其罪隱匿不

舉者連坐不貸庶幾賣劍買牛賣刀買犢之風
可復見矣

一撫戢遺黨督屬諸路地方先年盜賊猖恣各郡
生民被其荼毒甚矣二十年來先後軍門經略
漸次剿平大則誅夷小則降附今一時頗稱寧
戢但聽撫之徒雖云革面未能革心今諸路設
兵數多憚不敢逞萬一餉饋難支兵防稍汰能
保其終不復變乎化誨而懷服之則有司責也
若使有司官各以移風易俗爲任以潛消默制

爲心單車詣壘告以禍福曉以利害令其編修
立甲輸辦錢糧禁止吏胥里排人等不許毫髮
擾害每月朔望許令甲長赴州縣投見其子弟
有資質聰俊者引入社學爲之立師以教之稍
通文義者爲之請給衣巾與生員一體優免俾
速見爲善之利久之則人人相信獷悍之習漸
除親附之風自著有不變盜而爲良者未之信
也昔人有言得一良守踰勝兵三萬得一良令
踰勝兵三千是在良守令重加意焉三月之內

凡有遺黨州縣將撫化過村分姓名造冊申報
本院部將拭目俟之

一時給兵食督屬各衛所官軍及各水陸營寨募
兵月糧工食歲有常經若使請給以時唱散有
法無科斂剋減諸弊自免借貸之苦脫巾之呼
而士卒之氣自倍矣近據上班諸軍士告稱各
衛所軍糧有三四月或半年未給者而官吏科
派扣除且不敢言及各水陸募兵則虛冒尤多
誅求尤甚月領工食有原給七八錢止得三五

錢者有分給魚米布粟而將月糧扣抵倍收其
息者雖經委官給散旋復追還以致糧餉虛糜
兵力寡弱甚至各懷怨讟而起携叛之心者則
緩急將何賴哉以後督理糧儲及各守巡道將
各衛所軍糧及各路水陸營寨兵食查照舊規
俱要預期造冊呈請批行該道或府縣委官唱
名給領如有過違日久不行請支及委官不親
散給止聽將領哨隊人員總領致有虛包尅減
等弊該道卽行查究連坐委官之罪

一申嚴法紀廣中盜賊之所以不戢者固緣阻海負山人易從亂亦法紀積玩之所致也每遇盜賊剽掠鄉村或刼奪船貨州縣營哨等官率多隱匿不報其有申報者批行緝捕則視爲故事跟踪獲賊者什無一二批行提解則遲延月日如期解究者亦什無一二以致官兵無所懲創而捕禦愈踈盜賊無所畏憚而縱橫益甚至哨兵本以禦暴而反爲暴凡以治之不嚴責之無實故爾除分布責成之法已經另行外今後如

遇山海盜賊出沒刼掠該府衛縣掌印捕盜巡捕巡司哨堡及副總叅遊守把等官一面督率軍兵跟踪追捕一面馳報軍門施行如夥黨不多刼掠未甚初報責限緝捕過期不獲者提解究治若賊勢重大殺擄人財數多者先將專一哨守官拏解餘官俟緝捕不獲一併解究決不姑息各道均念切地方堅持法紀應究者必照格治罪應解者必依期提解其有玩法隱匿懷姦觀望及縱放真賊妄拏平民以塞責者俱從

重究詳使官兵畏法甚於畏賊則防禦自嚴盜賊自戢矣

一嚴禁接濟夫澳夷泛海而來本以商販爲事民利其貨以貿遷官資其稅以充餉初無不可者數十年間來者愈多而回者愈少卽今外有樓船岸有堅室而東洋商販亦雜其中全無分別四方盜賊誘掠男婦多歸於彼至有與小民爭競細故致傷性命者究其所由皆內地奸究引誘交通所致也訪聞番貨到澳經紀人等祇行

把持不令告官納稅不俟開市明文串同棍徒
私自賒取或騙唐客貨物抵換十倍覓利迨貨
物賣盡方以牙尖壞木抵充官稅了一故事而
已甚至貨物盡騙逃縣不還大啓爭端致生釁
竇無藉之徒亡命之輩皆以澳爲趨至造屋僦
居不可勝數往來接濟肩摩踵錯不啻大市近
且唆誘夷人告請省郊隙地以造寺宇習磨書
之謀者是其漸豈可長哉今夷人固未易驅徙
而交通接濟之輩皆我中國之人也縱而不治

將來之患大有可虞者矣聞此輩在省則賃有大房在澳則造有行店設使先治此輩禁革交通澳中房屋悉令拆毀船隻不許通行各番人貨物經納餉後方許買賣先期而犯者申明貨物入官人坐通番之罪確然行之不少假貸貨盡事畢寸帆片板肩擔背負足跡不許到澳彼番人久留無益不得不爲隨船往來之計矣庶其潛移默制之一機乎文到日巡海道嚴行守備備倭及府州縣掌印捕盜巡捕守海等官兵

將前項奸徒設法緝捕照依律例從重懲究獲
功員役從重給賞各夷日用米菜不得一槩禁
絕有失柔來之道其諸番投稅抽稅發票禁禦
一應事宜開造書冊呈送查閱

一清查白役自兩廣地方兵興以來各將領濫收
名色把總以管領哨隊營寨者甚多近年奉

旨盡革不許收役繼以多事之地或參用之但此輩
貫址不定往來無常方其夤緣求進百計鑽營
及委之以事假之以權則猶鼠同眠科斂侵剋

無所不至甚至縱容部卒借把截之名而邀財
禦貨者若不嚴行清查濫役匪人不惟廩餽虛
糜抑恐違悞機務彼時卽按之以法奚補於事
况聞風逃避又此輩之故智者各守巡兵備等
道備查該路大小各將領員下見用名色把總
若干員係何處人氏曾否歷有戰功奉何衙門
明文收用有無給與劄付并各道有收用者逐
一查明限文到一月內開具各履歷獲功給劄
收用及其名應留應革緣由造冊呈繳以憑存

留汰斥如不從實開報訪出定行拏究

一謹守城池督屬各府州縣衛所設當山海要衝
城守之防最屬緊要訪聞各該官司率多安常
習故城無擊柝之聲門鮮荷戈之卒或垣牆低
塌或雉堞傾頽或濠池被勢豪侵占或馬路被
居民包塞甚或草木叢生蓬架搭蓋舉手可援
而上者因循歲月不一加意整理殊非設險守
國之道各守巡等道通行所屬府州縣衛所掌
印正官逐一閱視如城垣堞堞有卑薄傾卸者

設法培修濠池馬道有湮塞包占者設法濬闢
凡有草木蓬架去處盡行鋤治拆毀合用工力
於官銀內動支尅期報完務使墉壑高深金湯
壯麗督令各軍兵常川防守傳籌傳牌毋容少
有懈怠諛道不時巡歷親行點閱敢有仍前因
循城池不行修葺及濫占官軍不撥城舖防守
者卽行拿究應叅提者據實叅呈以憑施行
一嚴防庫獄庫藏獄囚有司急務况近來

明例森嚴干係尤重但人情積玩姦弊易生庫吏庫

役通同侵盜往往而是兩廣所屬府縣犯者接踵至於禁獄又多踈防時有越脫之報甚至賄縱出桺糾黨仇殺爲患地方者布按二司并守巡等道嚴行各府州縣掌印官究心經理督令巡守人役晝夜防範墻垣門鑰之類逐一脩理完密一應收放錢糧俱親自稽點當時登記毋容寄頓外庫毋容私收吏牒毋容換易鈎馬出入重輕如衙門錢糧收支浩繁輪撥首領官一員眼同稽察以防侵盜其獄囚務要時加清理

嘉慶二十六年 卷一
十五
強盜人命重犯牢固監禁毋容需索錢財毋容
踈放杻鐐毋容潛藏寸鐵進入獄中軍徒速行
遣配笞杖速行發落不許淹繫有與

恩例相合者查照申詳釋放守巡道有地方之責尤
宜加意督行毋曰文具而已

兵部倡議崇質約言

時當清明禮重簡素宜敦節儉之德共追淳古之
風南都一時諸公相與宴會禮節大都已從省約
矣其尚有一二所宜盡去繁文以崇雅道者訂之

諸公翕然同心各悉所見爰畀之梓以示不忘云
一到任公宴乃衙門嚴肅之地官司號令之初故
事率用優人搬演戲劇以致輿臺廝養混雜喧
譁甚不雅觀應從革去

一聚會宴遊近奉

明旨嚴禁南都官屬旣肅然遵行矣間或雅相厚善
彼此邀致梵宮別墅怡情山水之間有之甚而
遊玩留連夜分始撤者不惟糜費無益亦且有
妨職業茲後各衙門痛行裁省

一故事年終九卿衙門設席邀請太常京兆諸公而諸公尋亦設席相答一歲一會情禮所宜但賓主計二十八席輿從不啻數百人不惟治辦之難而襍沓喧呼反成褻嫚又往往取辦於上江二縣兵馬司及神樂觀道人不無生擾我輩意氣之交道義之樂當不係於此也相應免舉一酒席除郊餞賓席量添果麪十餘器其尋常宴會俱止用一席櫝盒小坐加水果四品一切圍碗園碟等費應從汰省每位轎馬人役賓席給

錢一百文主席給錢六十文不辦酒肉燒餅以滋煩擾

一庚午前後劉安峰諸公約會各衙門新任止本衙門設宴成禮而散其諸衙門無舉賀預宴之禮近歲南五部各捐金一錢三法司各捐金四錢屬之本衙門別設一宴一錢者涉於簡四錢者近於豐多寡不齊又或赴或不赴者而新公一時兩宴又苦其煩禮似可省茲後如遇新公到任止本衙門舉賀舉宴宴畢回宅各衙門詣

宅相拜在各衙門無舉賀之擾在本衙門免重設席之累

一壽誕往拜禮也書儀尊酒幾於褻矣今後屆期舊有往來者止宜登堂一拜賀儀俱不必舉

一各衙門初任及齋捧考滿復任交際已繁深以省事爲便一拜之外不必槩送下程及果幣爲賀

一先輩交與皆以字稱近年稱號已不知有字矣至無論長少率稱曰翁尤失古人之意茲後彼

此相謂及書札相通止稱別號不必稱翁

一到任差人郊迎陞任差人郊送及賀正賀壽等項故事多用紅箋今後俱用白柬不宜參差尋常往來止投單紅帖

一往來拜訪登輿乘馬時賓主一揖爲別及升階入門各止舉手不必打躬

一彼此相拜非有外出偶恙無不接見間或參商卽踵門投帖自足成禮如連拜數次必求面復似非相忘之雅宜省之

一布帛柴米日用所不可缺者一涉官買必至虧損商民須用紋銀給發買辦人役公平買用但有以牌票擅取物件者卽屬官買或出下人詐僞生事不可不防許舖行人等徑執原票赴衙查究

一各衙門整辦酒席不論公會私會所用桌椅器皿等項俱各自備與五城總甲無干原係兵部奉

旨會議刊行今應申明遵守

考選軍政禁約

爲考選軍政事照得考選軍政

國家重典今歲正當考選之期已經通行各該衙門
從公查訪各官賢否去後但各衛官員數多賢愚
不等本部之查訪雖公各官之心志未定若不先
期禁諭誠恐衆志惶惑鼓亂是非致滋弊端有乖
重典今將禁約條款嚴行榜示以便遵守

一禁鑽刺以塞弊源查得本部職掌開載考選軍
政有營求囑託者指名黜退永令帶俸差操

明例森嚴各官亦宜惕然知省矣但人情易玩積弊
難除往年雖每有禁例之行卒未有能發其奸
而置之法者以故人心視爲故事恬不知畏僣
巧者長於夤緣博美缺爲肥家之計貪污者工
於彌縫碩請託爲倖免之階卑卑營營無所不
至其於法紀公道蕩然矣本部痛懲茲弊率談
司矢心天日毫不容私各衛所官員敢有故違
明禁仍前營求請託者即便大書姓名懸掛部
門照例重懲永不敘用悔之晚矣

二禁驅騙以防奸僞訪得每遇考選之年有等不才官員衙門積棍或指稱本部親戚故舊打點關節或指稱本部委訪等項名色多方詐騙淆亂是非損壞名節莫此甚焉本部深悉此弊頗知檢防今歲考選各官惟據其聞見之真採諸輿論之當臧否黜陟一秉至公並不私委一人體訪以開騙局其本部及該司吏典止令書辦公務皂隸止令跟隨出入隨任家人亦各封鎖在衙並不干預外事如有奸官積棍指稱本部

該司親識故舊吏書人等及假以訪察爲由在外誑騙者不分已未得贓許五城兵馬司與各該地方巡捕官兵緝捕解部照例究遣決不輕貸

三禁私揭以全善類訪得每年考選有等奸徒懷挾私讐無端造謗匿名投揭飛語訛言據其狡獪之情真可奪心而移慮墮其報復之計必至妨賢而害公此衆惡所以必察而膚受浸潤之譖不行焉可謂明之遠也已今次本部考選務

存公恕之心崇敦大之體其匿名投揭一切付
之水火各衛掌印官除有事公稟外亦不許私
具稟帖以起各官惶惑之心若有刁頑豪惡挾
讐牽告希圖中傷者俱不准理其投遞私揭及
貼無名帖者查照投匿名文書律例重究不貸
四禁規避以懲欺罔訪得每年考選之期有等不
才官員自知罪狀顯著勢難倖免乃先期托病
巧圖規避及考選已定卽藉口因病辭任名色
夤緣復用在本部墮術中之隱在各官遂法外

之姦其積弊所由來者遠矣今考選在邇各官
敢有踵襲故智托病規避者定行指名黜退中
間果有真病及事故者俱各委官暫署通候考
選之期通融查補

五禁姦辯以懲刁風查得本部職掌開載不與選
用及考黜官員敢有教唆陷害已選官員者問
罪調邊衛帶俸差操不許管軍管事蓋謂考選
重典陟斥至公棕桮非止一人稽驗非止一事
昭昭輿論誰敢枉其是非而低昂之乃往往有

不才官員平昔不能砥礪名節及事敗被黜輒
乃朋訐同僚攻擊本管展轉自鳴甘心反噬陽
以攻人之短而陰以發其恣睢暴戾之氣是尚
知有紀綱法度乎此而不禁非所以儆刁頑而
振法紀也今歲考選之後凡不與選及被黜官
員各宜恪遵

明例引咎自責洗心滌慮以需後用不許撓飾攻訐
自罹法網違者定行照例叅送毋貽後悔

六禁科斂以省煩擾夫治末者先端其本清流者

必澄其源往歲考選該司先期例取上江二縣
及各衛所書識抄案其貼寫紙筆之費在所不
免以故各衛所官員指稱科派乘機侵剋或扣
除各官之俸銀或取償各官之鹽價公行聚斂
恬不爲怪今次考選該司一應文移惟准謄寫
一張行各衛傳遞自行抄案並不得取上江二
縣及各衛書識一名其合用紙劄造冊書手工
食查照舊規俱於職方車駕二司支取一錢一
楮與各衛無干卽各衛造報各項文冊亦於職

方司地租銀內動給則各衛何用科派爲哉但恐積習日久相沿爲奸前項弊端難保盡無合無申禁各衛所官員今次如有踵襲積弊仍前指稱科斂者或查訪得出或被人告發官吏坐贓治罪若該司吏書指稱貼寫紙筆分例等項名色需索各衛者許該衛官據實呈稟以憑究革縱容不舉者事發一體重究

郭襄靖公遺集卷之十五

終

郭襄靖公遺集卷之十六

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

家訓

一明蒙訓古者八歲入小學教以洒掃應對進退之節十五入大學則以成人望之今人此義闕然矣

嚴乏義方慈率驕奉狹提稍長之良埋沒已甚比
其寢壯愚者溺媮惰之習智者亟榮進之圖而父
兄所以督課其子弟要不過博一第當一秩是足
高大其閭顯融其宗矣吾幼孤遵先公遺誨勉自
植立壯叨仕版念先公清貧世業雅志不在輕肥
茲三十餘年矣幸不負生平

天子待老臣殊不薄爾曹雖未登進世荷

國恩不可不立此心地以爲根本宴安是娛溫飽爲
志皆非吾願今後吾家子弟六歲卽宜延師家塾

教習句讀慎毋令外學與市井諸兒羣狎嫚語成
習也易曰養正於蒙何可不重十歲以上量其才
質漸次拓充尤宜擇嚴師益友與之朝夕不惟切
磋文章抑亦薰陶氣質家庭定省爲父兄者尤宜
提撕以聖賢大道祖宗正訓童而飫聞壯而實踐
幸而學成業就固自耻榮肥而思表堅卽或遇塞
猶不失以善士重鄉評其爲揚親顯宗孰大於此
此吾子孫當務第一義也

一端習尚凡子弟講習固所當嚴交遊尤所當慎蓋

少年血氣方剛志意未定僉壬之輩假駟騶書記
諧談以入最能巧術愚人或誘以呼盧博塞或誘
以粉黛優伶或誘以醉舞酣歌或誘以鬪雞走馬
利飾以義奸托之直變幻百出莫知端倪甚有窺
探人家事而持其是非小弁角弓白華種種諸禍
皆此輩能爲之子弟習尚一有不端比之匪人未
有不傾家蕩產而敗其軀者故凡此輩盡宜痛絕
吾晚得二子蚤暮在側出入必稟命後行往來朋
戚非關白不得輒通詩曰教誨爾子式穀似之吾

謂此法百世守可也

一崇謙德惡盈好謙天之道也故古人訓子以門第
高爲可畏不可恃故亡問親族卽處隣里有微且
賤亦當和顏交接吾性最拙直每誦寧人負我毋
我負人之句凡接人無衆寡小大兢兢不敢慢易
尤不喜以言語餽人并攻發人隱過吾涉仕途頗
久見世之貴人達官大抵忠厚長者絕無崖岸悻
悻矜已尚人終非遠器蓋吾卽學擅古今秩躋崇
臚亦是自賢自貴何預他人安可藉此便生驕心

卽間有橫逆難堪當思古人所遭更有甚於此者
惟能雅量優容自足以潛銷狂暴他如子弟僮僕
恃勢凌人皆足貽累名檢縱出枉抑只當責已不
必充人尤不宜怙威輕訐蓋勢有時盡而鄉族相
與無已時也至無名聯帖之類尤爲損德抵禁可
不痛哉

一絕嗜好胡文定曰士人當崇簡朴恬澹不可有富
貴相故不惟顛狂滅義淫縱傷生當剜骨痛戒卽
嗜好之類如溺琴碁聚寶玩購字畫蓄古款以及

不務本業耽事詩酒自謂放達清流豈知爲身家
大蠹吾性迂拙絕無嗜好居端許多年未嘗畜一
硯貽二子非故矯激沽名誠不欲以此啓子孫驕
奢之習

一務世業箕人之子學爲箕裘人之子學爲裘吾家
子弟固當以詩書期紹先業其有資質庸駑不堪
上進者亦宜令及時各占一藝毋容坐食山崩終
成蠹物至於女子六歲以上卽宜教習紡績專精
女工至記書認字不過粗辨帳數已耳

一戒營利人生福祿各有定分不可強求田地財物
得不以義子孫必不能守故倣利而行不問居官
居鄉皆歛怨之道也古人造錢字一金二戈蓋利
少害多旁伏劫奪之禍其聚也旣以不善其散也
奔逸四出安能以善去殃其身及其子孫多藏必
厚亡老子言有味矣吾每念貧時蔬食茹羹猶不
易得今幸受

主恩至此常懼報稱無繇斷不肯爲欺天欺心貪昧
隱忍之事爾曹但能勉自樹立亦可不至饑寒若

究其極此身之外皆爲長物何徒自苦且虺毒其
子孫爲也至於霸占僧屯田土接受投獻產業與
放債車估準折人子女房屋尤非盛德昌後事非
獨不可身爲僮僕輩皆宜痛禁王文正公每有賜
祿見家人置於庭卽瞑目嘆曰生民膏血安用許
多每見家人服飾卽瞑目曰吾門素風一至於此
李文靖公亦謂世界猶有缺陷安得圓滿自求稱
足此非胸襟濶大識見超越者孰道及此誠可効
法

一謹昏嫁婚姻論財夷虜之道但當擇儉朴有家風者爲上不必計其仕宦之顯赫貲財之充盈與否司馬溫公曰凡議婚姻當先察其壻與婦之性行及家法如何勿苟慕其富貴壻苟賢矣今雖貧賤安知異日不富貴乎苟爲不肖今雖富盛安知異時不貧賤乎婦者家之所由盛衰也苟慕一時之富貴而娶之彼挾其富貴鮮不輕其夫而傲其舅姑養成驕妬之性異日爲患庸有極乎借使因婦財以致富依婦勢以取貴苟有丈夫之志氣者能

無媿乎大抵汰侈之家其子女必驕而愚儉朴之家其子女必恪慎而兢兢禮法蓋其習然也婚姻人道之始何可不慎所擇者其禮大率準家禮行問名只遣一二謹厚媒人以年生通訊二家允許或以花幣或以首飾爲定有問名納徵同時並行亦聽其便俟男女長成先以期請然後婚娶聘禮從我嫁飾從彼貧而不及者爲隨分富而不及者爲敦簡皆可推獎有相拘索爭者是自夷虜其閥閥也婚之日奠鴈禮必不可廢至則壻婦交拜合

必有祭報本追遠之義最嚴世俗前期不齋臨祭無儀祭畢請客飲酒皆太子孫受室者不至則簡均非禮也今遵照

大明會典內載周制祖廟天子七諸侯五大夫三適士二官師一庶士庶人無廟祭於寢漢唐以下代有沿革先儒朱子約前代之禮創祠堂之制品官之家立祠堂于正寢之東庶人無祠堂惟以二代神主置於居室之中間或以他室奉之

國朝品官廟制未定權倣朱子祠堂之制奉高曾祖

禰四世之主亦以四仲之月祭之又加臘日忌日
之祭與夫歲時俗節之薦享至若庶人得奉其祖
父母父母之祀已有著令而其時享於寢之禮大
槩畧同於品官焉典禮昭然何敢不恪吾家廟貌
鼎新祀事宜茲歲定春秋二祭朔望忌辰時薦諸
禮一一不可缺其儀物遵所定簿例有服之祖諱
日皆用青衣素服父母則有終身之慕用白巾縞
衣遺像遺書遺衣當年者善加藏貯逐年交收損
失者罪當年

一脩宗譜程子曰宗子法廢後世譜牒尚有遺風譜
牒又廢人家不知來處百年之後骨肉無統雖至
親亦薄故譜者姓氏之經緯家代之綱紀也吾家
譜牒由來已久不幸火於倭掇拾煨燼之餘尚存
什一於千伯不至無稽自茲以後遺祜益綿生齒
漸盛定五年一稍輯十年一大脩入之梓此自有
志有力者事義田中量資其繕錄助其刊行則不
可已也

一時祭掃祭掃先塋春秋再舉於禮於情皆不容恕

今定以清明重陽二候即有極冗必須及時舉行
陰晴遲速不得過五日禮物照簿例本房子孫既
冠娶者立簿列名當年執簿預徇于衆違期及不
至者皆有罰展墓時宜整肅成禮從容遍度山域
平時督守塋者勤照類則以時葺之責在當年之
人

一稽圭田古有圭田以供祀事卽今烝嘗租是也祖
宗旣有所遺不容子孫分析及私行變賣犯者卽
爲祖宗罪人衆共斥之不與復收租穀毋論居官

業商租不滿百者力自不贍有置至二百石以上者斷入租十石以增本宗烝嘗等而上之每百而取其五石上奉祖宗殊不爲過恡不與者守錢虜耳有願推及公祠入租均衆者衆共以大義獎之司馬溫公曰積金以遺子孫子孫未必能守念之念之何如以崇孝祀之爲可久也且私積易析公田永流其爲子孫計亦未必非兼得矣

一汰喪燕居喪宜一軌之禮不可赴酒筵邀盛客絲竹之類非惟已不忍設偶聞其音急宜趨避不可

與坐至於初喪孝子固無飲酒如暈之理張筵置
酒以待吊客均屬非禮蓋赴吊之客非吾姻婭即
吾友朋俱有同憂共戚之誼食於喪側安忍於飽
爲孝子者亦安忍口腹其人而處之非禮也今人
沿襲成風驟革似簡稍存挽回者終不能破俗輩
天下儉親之誚不知孟氏所指較於吾心乃爲棺
槨衣衾之類此在送死自當大事於此不盡心安
所盡其心有不竭吾力所能爲者爲之豈足爲子
世俗於此反多忽處而傾貲罄產於享會吊客之

煩文嗚乎薄死者之具夸生者之觀孟氏忍見耶
豪傑之士自宜特操有與吊而責人以此真飲食
之人則人賤之矣何所恤其短長也遠鄉臨吊者
當欸便飯毋得張筵蔡忠惠公著戒以生則盡養
死無妄費爲孝之本諒哉佛事宜遵家禮革去

一禁停葬葬者藏也欲人不得見也力能辦者隨分
盡禮不可以天下儉其親貧者穴土藏棺成禮而
已世有妄惑風水禍福及興發某房之說停葬父
母至十數年屍棺暴露骨肉忍殘傷害天和變生

瘟疫爲故匪細痛哉惜哉今定爲例除已有地者
自亟葬未有者喪內宜亟下地有停柩至服闋一
年溺於風水兄弟相推托不葬者卽屬非孝葬地
固不宜太逼城郭尤宜稍近十里之內爲上二十
里次之至二十五里而止有溺風水而必遠卜每
歲春秋祭掃貧者不辦輿馬弱者不耐驅涉久之
享祀不繼甚且并墓所失之覬渺茫不必然之福
而棄其身所自出也犯此者罪之

一厚吊恤慶賀之禮皆可省惟吊死恤孤不可愆靳

蓋親族朋友平居飲酒徵逐談道義披情欸侈纒
飾繁磬折詡詡夸悅夫孰不能一遇死生利害未
免易心此最情義之薄者君子不道今後凡遇親
族朋友不幸有故宜盡心維持極力周恤賻贈之
禮悉宜從厚有孤寡不能自存及外侮橫加者亟
區處扶全甚爲撫誨待其成立生締石交歿見道
殯豈心所忍卽宜代爲殯厝賻襚輟奩嫁孤資錢
助葬天道好還古誼具在汝曹勗之

一先親睦骨肉天親連枝同氣凡利害休戚當死生

相維持若因財產致爭便道路人相視死生患難
反面不相顧甚且輸情外向觀變旁嗤祖宗有靈
豈忍見此良心滅絕何擇豺狼人禍天刑應捷桴
鼓昔人云世間至易得者田地至難得者兄弟當
熟念之故古有九世同居六院同庖兄弟妻妾無
私斗粟尺帛此最高誼有志者自宜法之但今大
家長幼臧獲食指頗多其間人心不能盡協若必
拘合居同爨反生異同不如父母臨以至公兄弟
處以和氣交思遜讓勿占便宜錢穀出入各從其

便一應吉凶慶吊燕會公禮自當合舉當年者總
其事毋容分析豈獨省費亦足聯情願吾子姓各
存此大體器量大者自然不屑私利器量小者亦
勉強相效則家興仁讓福祚無窮矣至於族戚親
知絕不宜交利營私希圖封殖恐取予之間一生
猜嫌終傷肉骨有真貧者量吾力所能辦從厚周
之母恡吝也

一定義祖范文正嘗謂子弟宗族於吾有親疎然吾
之祖宗視之則均是子孫固無親疎也吾安得不

恤其饑寒且自祖宗來積德百餘年而始發於吾
得至大官若獨享富貴不恤宗族他日何以見祖
宗於地下今亦何顏以入家廟置爲義庄以贍貧
族其法至今稱善吾宗發祥魏闕諸附闕居者率
耕讀而貧吾衆政展墓已畧倣此意置租若干及
侍郎守制復增益之貧不能婚若葬者悉取給焉
散歛之法董之族長族秀族幹詳具三孝祠規吾
本房子孫每歲務推一人稽其出納毋致紊廢有
失睦族本意

一省宴會待客品物本有常規如親友常往來卽一魚一菜亦可相留司馬溫公曰先公爲郡牧判官客至未嘗不置酒或三行或五行不過七行酒沽於市果止梨栗棗柿殽止脯醢菜羹器用磁漆當時士夫皆然人不相非也會數而禮勤物薄而情厚今後常燕殽醢不過四品佐以二蔬如遇尊客稍加至倍而止侑以三湯列以四果不必過繁酒隨所有不必強勸澹泊能久賓主相驩但求適情而已其有非肖子弟務以豐侈相矜廣邀狂客醉

舞酣歌酣飲徹夜自爲豪舉或因之呼盧擲采爭
賭勝負竟以傾貲蕩產不悟或因之使酒逞氣嫚
言興辭不顧訕辱其身或因之傾倒街市毀傷遺
體而貽惟疾之憂似此之習皆爲兇類卽達如劉
伶吾不願汝曹有此也

一節經費昔人以室利孔戒漏卮爲守家良法蓋殖
利所宜痛禁費出不可無經吾家世宦清白尤當
節縮除一應內外冗食及不堪婢僕與戚黨比鄰
閑雜往來之人虛糜無益者悉行汰去外每歲租

穀收儲以若干供歲用以若干辦糧差量存十分之三封積以備凶荒糴穀銀兩亦宜量入爲出務存贏餘以預婚喪大禮及諸意外不測之費歲置出入簿二扇一紀錢銀一紀租穀凡百費皆書計合家長幼尊卑人口共若干長者月給穀五斗幼者遞減季總計若干衣服蔬果油薪尊者月量給銀若干卑者若干季總計若干各房登簿預備賓客往來穀若干親族慶吊節序問候公禮銀若干此則輪當公用者支持亦各簿記按季支給閏月

照加做四柱法挨順日月逐項勿遺以憑公私查
考覈廩務固封識毋容僮僕擅開以防冒竊

一平收糶田租不問公私各應置簿開寫某佃人承
耕某地名田若干該早晚租穀若干已完尚欠若
干各明書項下如遇荒歉當思農作之苦慎勿刻
意取盈毋容僮僕人等額外秤頭加收致有不堪
如遇荒凶亟宜平價以倡閭右恤鄰鄙閉糶擡價
之事最不可爲

一辦糧賦凡人一飯之恩猶思圖報荷

天之德食土之毛肥私虧賦禽獸何擇吾家諸房幸
俱有租稅可納宜各房磨算置簿開寫某房某地
名田若干載租若干應納某名色米若干合一房
共若干請官額分幾限先期措辦如期完納有故
違者責在某房毋相推諉毋覬倖赦則官省催科
之勞門免督趣之擾豈非善民若平時分派不定
急則互推各房骨肉自相迫促或已定派平時不
知預算積貯以應徵輸急則倍息稱貸於人又無
措則遺累比徵自罹桎梏此皆蕩覆無日矣可不

畏哉

一嚴出入外人不入內人不出最爲第一家法凡巫
婆賣婆媒婆三種婦人遊行閭巷往來人家慣能
搖鼓唇吻簸弄是非甚且看覷虛實誑誘盜賊何
所不至豈可聽惑婦人所讓貿易縱其出入不問
媒婆家有子女婚娶臧獲鬻買勢不能盡無亦須
慎擇謹厚熟識者一二餘者不得入二門鄰舍老
嫗亦未必善人有夤緣混入者責在與進之人其
方外左道諸家假稱燒煉符呪類多無藉之徒小

之欺騙大之鉤通皆其慣習均宜絕之至於吾家
婦女尤宜嚴境外之禁元宵張燈遊觀市里間有
蕩子故突謾嘲隱忍甘受是獨何心每遇平時當
家者各譏察扃鑰以防臧獲私遊不可怠縱春夜
尤謹婢婦親上市街僮僕徑入中堂皆須禁止昏
暮不許慢遊宴會亦必早散世情叵測宜儆非常
吾里居數載此法素定內外出入頗稱嚴肅子願
未恪遵母失此意

一別嫌微禮有之父母沒無歸寧之義兄弟往來立

談不逾門閥別嫌明微其禮至肅其在孀婦稱未
亾人尤宜必慎父母而在猶制於義沒可知矣不
拘父家夫家一應吉慶筵燕事皆不得與記著從
父從夫從子之條爲女子者固宜以禮自閑爲夫
子者尤宜以禮立教至於平時親族往來幼小男
女皆當教令迴避多有姑姨表兄弟姊妹自少出
入無間長而恬不爲怪者非所以訓也

一杜戲劇戲者戲也其間借諧謔以勸世者固有然
旣謂之戲則俚褻之語淫狎之態何所不至矧優

伶輩大都狡獪之尤又每極意諛浪以悅聽聞浮
薄子弟廣招厚畜置酒張筵聲樂雜陳歌舞競售
手持竹板身盤旋唱和其中以自以爲得意而不
知有識君子已嗤鄙而慮其終矣吾嘗究人家演
戲之蠹有五賓客交錯揖讓相先乃此優人喧譁
雜遝嘲諛無忌體統謂何蠹一演戲之家擁觀必
衆扃鑰則拋擲羣呼闢戶則競入混雜夜暮更闌
勢不能止無賴惡少因而窺伺其隙是曰誨盜蠹
二劇戲當前諸客羅列在坐而婦女垂簾娶觀男

女竊覷已失別嫌之道唱舞褻媒蕩人心志是曰
誨淫蠹三

朝廷命服所以辨分先人遺裳所以求思內人衣飾
所以明微乃志溺優伶意期華侈不問槩用之一
舉而瀆分忘孝瀆防衆惡畢具蠹四子弟少年志
氣未定習陵亂之音狃俳優之態比狎頑童包挾
女旦皆起於此蠹五有一足傾其家矧五乎吾里
居卽宴會未嘗設戲今後子孫永宜遵守禁絕毋
失初意如有上官尊客大禮不容已者鼓吹無妨

也家有期功之服卽大禮亦不得用

一倣僭踰禮辨上下定名分毫髮不可僭踰吾莆壬戌以前猶多古意此後風漸汰侈人漸踰越甚有厮養下賤巾服類士人緣履奪天孫與夫撮白領之屬遣女娶婦侈飾高興揚揚街市僭之恬不自慙縱之恬不爲恠蠹壞風俗傷敗人心設令賈傳見之不知宜何如痛哭流涕者有志者宜共維禮法挽回古風毋貽羞於海濱鄒魯

宗法議

程子曰宗子法立則人知尊祖敬宗而朝廷之勢自尊甚哉宗法之爲重也考宗子法王氏家藏備載云別子爲祖繼別爲宗繼禰爲小宗別子爲祖者始受爵秩與始爲祖者也繼別爲宗者別子之嫡子繼別子爲族人之宗是爲大宗世世嫡長子合族共宗之所謂百世不遷者也別子之庶子不得以禰別子故以其長子繼已爲小宗而別自爲禰其同父之兄弟共宗之二世之嫡子同堂兄弟亦共宗之三世之嫡子再從兄弟亦共宗之四世

之嫡子三從兄弟亦共宗之故曰小宗有四至于五世四從兄弟視小宗之高祖爲高祖兄弟而無服矣故不復宗五世之嫡子而復自別爲禰其同父之兄弟共宗之而復爲小宗之始矣是謂繼禰爲小宗大宗以祖爲自出小宗以禰爲自出宗法者治世之要道也顧古之行此法者大抵世祿之家今世祿猶行之其他卽華宗世族闕焉弗講其說第難於或宗子穉微高年尊官傍觀未便遂至於無此拘礙者亦寢格不行不知論世次與論宗

法原無異同拘礙宗子穉微高年尊官不得主祭
揆之人情誠未便矣設族長行高祖父年穉微高
年尊官皆在子孫之列例亦不得主祭便乎不便
乎按禮記曾子問宗子爲士庶子爲大夫其祭也
如之何孔子曰以上牲祭於宗子之家祝曰孝子
某爲介子某薦其常事注曰孝子宗子也介子庶
子也不曰庶而曰介者介則副貳之義貴貴之道
也卽孔子之言觀之則宗子主祭而居官者亦得
同主祭固所以明尊尊亦所以伸貴貴情禮二者

並行不悖視之以行高主祭而尊官反抑在子孫
不與名者便不便相去何如然則祭之祝將如何
祝曰孝子某同介子某昭告云云孫則曰宗孫介
孫此孔子遺意不量繹其義以俟夫博古好禮之
君子

或問繼宗曰今之立後烏在其繼宗也繼大宗爲
正禮繼支子爲非經先正論之詳矣康礪峰太史
述田豫陽學憲之議大都謂嚴父故尊祖尊祖故
敬宗故禮曰別子爲祖繼別爲宗繼別之子是謂

大宗百世不遷者也上以承祖廟下以收族屬猶
木之有本也沒而無子則族人推其支子之倫序
相當者爲之後故禮曰爲人後孰後後大宗也非
大宗而立後古未有也故曰支子不繼但有親兄
弟則當祔祭不必續之令別爲一廟也後世立後
之義不明不思宗子之重一父數子一有短折卽
割兄弟之子以子之名爲立後何其徂聞見而昧
本始耶蓋善乎羅虞臣之推言之也虞臣之言曰
譜之不予人之爲後者何也曰今之爲人後以利

焉而已抑本而誣禮者之爲也吾何予焉曰然則如何而後可以爲人後曰卜子夏曰爲人後者孰後後大宗也大宗不可絕故族人以支子後之晉張湛曰後大宗所以承正統也若所繼非正統之重無相後之義今也所後非大宗之主小宗五世之嫡而輒爲之置後無乃與先王之制異乎宗之嫡死而無子然後得爲置後庶子不置後不繼祖與禰也非所後而後焉是曰誣禮捨天性之愛而父他人孝子所不忍也是曰抑本苟有田產財計

則爭爲之後無則雖猶子於世父棄也是曰懷利
三者皆自叛於先王之教者也吾何予焉曰然則
庶子之無後者不爲厲乎曰禮曰殤與無後者從
祖祔食不斬祭也如之何其爲厲也曰人有抱其
同宗之子而育者則亦可以爲後乎曰可養育之
恩大矣哉其稱之爲父母也豈若今之立繼者之
比歟曰長子亦可爲人後乎曰奚而不可昔孫遠
死而無嗣其弟重以長子彬後之或曰重之命非
也長子不得爲人後曰斯重宗之義也吾將以重

爲知禮矣昔子思兄死而使其子白續伯父以主
祖及曾祖之祭蓋遠嫌也以已代兄是謂奪宗以
子繼伯父則有父命焉其孔氏之家之變禮乎重
之命惡得爲非唐荊州太史自以是爲獨見而亟
贊虞臣之知禮此可以知繼宗之義矣

或問譜例曰族之出贅某氏移居某鄉繼嗣某公
例並著世表入贅血養擯不得書凡以明宗也虞
臣曰譜法有進有黜他姓之子後吾宗雖成派吾
其猶黜諸吾宗之子爲他姓後雖易世吾其猶進

諸譜妄何也以義起也昔魯莊之成風也文之嬴也襄之歸也成之姒也妾也舉以子故書薨書葬書夫人春秋之義也妾有承宗之子吾奚其不譜且聞之禮稱妾有子祔於祖姑之廟廟可祔獨譜乎哉獨譜乎哉或問世有譜其出嫁之女者曰多乎哉彼則自有譜是亦以重吾宗也

或問祀典曰吾宗譜著自孝子廷煒公廟祀

孝節義重公爲大宗始祖者以

旌表雙闕自公始禮始受爵秩別子爲祖是也其推

德曾公繼別爲宗而堯若公別自爲禰瑚公繼禰
爲小宗則明乎以宗法示後人矣今因循已久宗
子主祭卽未易卒舉吾福一德曾公派見存東華
店裏亭邊三房壽二堯若公派見存大廳小廳七
步烏石亭下草塘六房蒸嘗照舊例長三房與次
六房對輪福派三年一周壽派六年一周居遠子
孫附闕親房爲之支荷其埕上房義實公後於三
孝公爲堂從伯叔兄弟派孝闕祇助祭爲榮禮也
迺本派福壽對輪十二年遍後間與預供一年者

原推廣三孝公孝友之意以示聯屬是亦禮順人
情以義起耳長族主祭定須推孝節公宗派子孫
爲定規後有愛禮者宗法其有興乎其闕中堂寢
累朝旌表列祖崇祀禮爲百世不遷之廟何可不
重無論宗派旁支子孫俱毋得就居媒慢自取幽
責明非甘露林萩蘆溪澄山松門四墳山孝母與
三孝公發祥之地木本水源命脉所係香燈祭田
則肇自孝節義重公蒙恩欽賜孝子廷煒公奉詔
請復歷宋至

明官師之所捐助子孫之所增拓五百年來血食攸
賴均宜保愛吾宗起家孝友誰無是心矢於有衆
自今萬萬毋容潛鬻陰獻祖山毋容旁營殘傷祖
墓毋容私行採伐山木典賣祠田者萌其間有一
於此皆爲祖宗罪人衆共褫革不列祠墓祭饗此
卽預爲不必然之防要亦尊祖敬宗之同心孝子
順孫之長慮也朱文公不云乎家之興在孝敬族
之大在禮義孝友相先禮義相維凡我宗人尚共
勗諸是皆有關於宗法者故以類記

郭襄靖公遺集卷之十六終